



SRIRANGAM SRIMAD ANDAVAN ASHRAMAM



श्री देशिक स्तोत्र माला  
श्री अच्चुअ सअअम्

कवितार्किककेसरी श्री वेदान्त देशिकन्

Anugraham, Kataksham and Shrimukham



Pitadhipathi Srimad Sri Varaha Maha Desikan

श्री अच्युत शतकम्

श्रीः

श्रीमान् वेङ्कटनाथार्यः कवितार्किककेसरी ।  
वेदान्ताचार्यवर्यो मे सन्निधत्तां सदा हृदि ॥

आर्याः छन्दः

सिरि वेङ्कड णाहज्जो  
कइतक्किअ सीह सव्वतन्त सतन्तो ।  
वेअन्तारिअवज्जो  
मह सण्णिज्जेउ सइ सअं हिअअम्मि ॥

णमह तिअसाण णाहं  
सच्चं दासाण अच्चुअं ठिरजोइम् ।  
गलुल णइ तड तमाळं  
अहिन्द णअरो सहाअलेक्क गइन्दम् ॥

[००२.०००१] [०००३०]

किङ्करसच्च थुई तुह  
सअंभु गेहिणि विलास वाहित्त मई ।  
फणिआ बाळेण मए  
पञ्जर सुअ जप्पिअं व कुणउ पसाअम् ॥

[००२.०००२] [०००३१]

मइलं वि भासिअं मह  
किङ्करसच्च तुह कित्ति जोण्हा पसरे ।  
लग्गं लहउ विसुद्धिं  
रच्छासलिलं व तिवहआ सोत्त गअम् ॥

[००२.०००३] [०००३२]

तत्थरिणण ठविआ  
सोहउ तिअसाण णाह तुज्झ समाए ।  
वन्दित्तण महिआणं  
मज्झम्मि सुईण बालिसा मज्झ थुई ॥

[००२.०००४] [०००३३]

अम्ह गुरूणं अच्चुअ  
जीहा सीहासणम्मि लद्ध पइट्ठो ।  
पडिवाइअ परमट्ठो  
वारेसि अपण्डित्तणं अम्हाणम् ॥

[००२.०००५] [०००३४]

हिअएसु देसिआणं  
जणहइ लहरीसु पुण्णचन्दोव्व फुडो ।  
कलुस जलेसु व हंसो  
कसाअ कबुरेसु ठासि अच्चुअ ण खणम् ॥

[००२.०००६] [०००३५]

आअम मेत्त पमाणो

आगोविअणं पआस णिअ माहप्पो ।  
सद्दहिअ हिअअ सुलहो  
दूरं मुअसि णअसच्च डोलाअन्ते ॥

[००२.०००७] [०००३६]

सइ खविअ सअल हेअं

सरणागअ सच्च सच्च णानाणन्दम् ।  
उल्लङ्घिअ तिविहन्तं  
उवणिसआणं सआइ गाअन्ति तुमम् ॥

[००२.०००८] [०००३७]

कुणसि ण कीरसि केण वि

ठावेसि ण संठविज्जसि अणण्णठिओ ।  
हरसि णिहिलं ण हीरसि  
अहिन्द णअरिन्द अणह जोइ फुरन्तो ॥

[००२.०००९] [०००३८]

अणुपमिअस्स वि अच्चुअ

सत्ती तुह सअलधारणाइ बहुत्ता ।  
तेण पडिवत्थुपुण्णो  
सुव्वसि अपडिहअ णिअ ठिईसव्वगओ ॥

[००२.००१०] [०००३९]

सअलाण धरण णिअमण -

सामित्तण णिअम संठिओ सव्व तणू ।  
सुव्वसि अच्चुअ सव्वो  
सअ दंसिअ कज्ज कारणत्तण कबुरो ॥

[००२.००११] [०००४०]

पुरिस पहाण सरीरो

भुवणाणं होसि अच्चुअ उवाआणम् ।  
णिअ संकप्प सणाहो  
वहसि णिमित्तत्तणं वि अब्भुअ सत्ती ॥

[००२.००१२] [०००४१]

विसम गुणङ्कुर पअरे

जलं व सामण्ण कारणं तुह केळी ।  
णिअ कम्म सत्ति णिअआ  
अच्चुअ बम्हाइ ठावरन्त विसेसा ॥

[००२.००१३] [०००४२]

पुरिसा तुज्झ विहूई

अच्चुअ लच्छीअ इत्थिआ सण्णाओ ।  
णत्थि परं तुज्झाणं  
सा वि सिरी होइ तुज्झ किं उण इअरम् ॥

[००२.००१४] [०००४३]

ण हु तुह सरिसम्भहिआ

णाह तुमं एव्व सव्वलोअसरण्णो ।

एआव णाण सारं

इअ मुण्डिउं तिअसणाह इअरविइन्ता ॥

[००२.००१५] [०००४४]

भाई फणिन्दउराहिव

पडिवालेन्तेसु पाअडवहुत्तफला ।

अवि दुहिणप्पमुहेहिं

आणत्ती तुह अलङ्घणिज्जपहावा ॥

[००२.००१६] [०००४५]

णिअमविहीण पउत्ती

सव्वाण वि दाससच्च उदिसिअ तुमम् ।

सद्धणिमन्तिअबम्हण -

समाहि सिद्धम् लहन्ति तिअसा भुत्तिम् ॥

[००२.००१७] [०००४६]

आरज्झतिअसविलए

अच्चुअ णिच्चं ण ठासि जइ णाम तुमम् ।

कम्माण कप्पिआणं

काहीइ कप्पन्तरेसु को णिव्वेसम् ॥

[००२.००१८] [०००४७]

कप्पेसि कंखिआइं

कप्पदुमोव्व सिरि कञ्चण लआ सहिओ ।

णअसच्च सइ फलाइं

णिअछाहि णिहिण्ण णिच्चताव तिहुवणो ॥

[००२.००१९] [०००४८]

सअलाअमाण णिट्ठा

सअळसुराणं वि अन्तरो अप्पाणो ।

सअळफलाण पसूई

सअलजणाणं समो खु णअसच्च तुमम् ॥

[००२.००२०] [०००४९]

इअ सव्वाण समाणो

सच्चठिओ दाससच्च सइ परिपुण्णो ।

किह वहसि पक्खवाअं

पण्डवपमुहेसु पेसणं वि सहन्तो ॥

[००२.००२१] [०००५०]

विसमम्मि कम्ममग्गे

विपरिखलन्ताण वीहलिअकरणाणम् ।

णाह णिहिलाणअण्णो

णत्थि तुमाहि णअसच्च हत्थालम्बो ॥

[००२.००२२] [०००५१]

णाणस्स को अविसओ

अच्चुअ कलुणाअ तुज्झ को दूरठिओ ।

सत्तीअ को अइभरो

ता खु उवाओ तुमं चिअ सअं सिद्धो ॥

[००२.००२३] [०००५२]

संकप्प कण्ण हारो

किङ्करसच्च भवसाअरे अइगहिरे ।

अणहो तुमं खु पोओ

अप्पाण किवासमीरणेण पउत्तो ॥

[००२.००२४] [०००५३]

अच्चुअ ण दन्ति मोक्खं

ईसरभावेण भाविआ इअरसुरा ।

रत्तिं परिवट्ठेउं

लक्खं आलेक्ख दिणअराण वि ण खमम् ॥

[००२.००२५] [०००५४]

अमिअरससाअरस्स व

अहिन्दउरणाह णिम्मलमहग्घाइम् ।

तीरन्ति ण विगणेउं

अणण्णसुळहाइ तुज्झ गुणरअणाइम् ॥

[००२.००२६] [०००५५]



भूसिअ सुइ सीमन्तो

भुअइन्द उरेस सव्वगुण सीमन्तो ।

खविअ तिसा मळ मोहो

मुणीण हिअएसु फुरसि सामळ मोहो ॥

[००२.००२७] [०००५६]

सुह लक्खण सिरिवच्छो

सोहसि णिम्मत्त विरह खण सिरिवच्छो ।

रण देवण सविहगओ

उद्धण गलुल णइ तीर वण सविह गओ ॥

[००२.००२८] [०००५७]

अकुमार जोव्वण ठिअं

अहिन्द उरणाह अहिमअं अणुरूवम् ।

णिच्चं सहाव सिद्धं

सुव्वइ सूरिमहिअं सुहं तुह रूवम् ॥

[००२.००२९] [०००५८]

तिउणं तस्स विआरा

अच्चुअ पुरिसोत्ति आअम गणिज्जन्ता ।

अत्था तुह खु समत्ता

परम्मि रूपम्मि भूसणत्थ सरूवा ॥

[००२.००३०] [०००५९]

णिन्ति तुमाओ अच्युअ  
णिक्रविअ विवक्र णिट्टुर परक्कमणा ।  
संठविअ परम धम्मा  
साहु परित्ताण सप्फला ओआरा ॥

[००२.००३१] [०००६०]

हरि मणि सरिच्छ णिअ रुइ -  
हरिआअन्त भुअइन्द वुरपेरन्तो ।  
काले दास जणाणं  
कण्ह घणो होसि दिण्ण कालुण्ण रसो ॥

[००२.००३२] [०००६१]

गलुल णइ कच्छरणे  
लक्खिज्जसि लच्छि महि करेणु मणहरो ।  
दीसन्त बहुळदाणो  
दिसा गइन्दोव्व खुडिअ दणुइन्द दुमो ॥

[००२.००३३] [०००६२]

मुहचन्द म०ळि दिणअर -  
मज्झिठिओ तुज्झ चिहुर भारन्धारो ।  
अघडिअ घडणा सत्तिं  
सच्चं ठावेइ दाससच्च समग्गम् ॥

[००२.००३४] [०००६३]

परिहसिअ पुण्ण चन्दं

पदुम सरिच्छप्पसण्ण लोअण जुअळम् ।

संकप्पिअ दुरिआइ वि

संहरिअं हरइ दाससच्च तुह मुहम् ॥

[००२.००३५] [०००६४]

माहप्पं तुह महिअं

मङ्गळिअं तुळसि कोत्थुहप्पमुहाणम् ।

अच्चुअ ठिरवणमालं

वच्छं दंसेइ लच्छि लक्खण सुहअम् ॥

[००२.००३६] [०००६५]

णिव्विसइ णिन्ततावो

देवअणो देवणाअअ विहिप्पमुहो ।

सीअळ सन्द पउत्तं

छाहिं तुह विउळ बाहु कप्प दुमाणम् ॥

[००२.००३७] [०००६६]

संकप्प चन्द खोहिअ -

तिउणोअहि विउळ बुब्बुअप्पअरेहिम् ।

बम्हण्डेहि वि भरिअं

किङ्करसच्च तुह कीस णु किसं उअरम् ॥

[००२.००३८] [०००६७]

णाहिरुहं तुह णळिणं  
भुअईसर णअरणाह सोहइ सुहअम् ।  
मज्झ ठिअ बम्ह भमरं  
वच्छासण लच्छि पाअ वीढ सरिच्छम् ॥

[००२.००३९] [०००६८]

दिढ पीडिअ महु कइढव  
सोणिअ पडल परिपाडलम्बर घडिआ ।  
राअइ अच्चुअ मुहला  
रइणाह गइन्द सिङ्कला तुह रसणा ॥

[००२.००४०] [०००६९]

दासाण सच्च दीसइ  
दाणव वीराण दीह णिद्दा सअणम् ।  
तुह उअरठ्ठिअ तिहुवण -  
पासाअक्खम्म सच्छअं ऊरुजुअम् ॥

[००२.००४१] [०००७०]

जाणु मणि दप्पणेण अ  
जङ्घा मरगअ कळाइआए अ धणिआ ।  
अच्चुअ ण मुअइ कन्ती  
लच्छी व सरोअलज्छणे तुह चलणे ॥

[००२.००४२] [०००७१]

सुइ सीमन्त पसूणं

सोहइ णअसच्च तुज्झ सव्व सरण्णम् ।  
कमण खण जणिअ सुर णई -  
पसमिअ तेल्लोक्क पाअअं पअ पदुमम् ॥

[००२.००४३] [०००७२]

इअ तिहुवणेक्क मूळं

आसादेन्ति अणहा अमिअसाउरसम् ।  
ओसहि महिहर पासे  
उइअं तुं ओसहिं व दासरुआणम् ॥

[००२.००४४] [०००७३]

सिद्धञ्जणं व सामं

तुज्झ तणुं णिअ विलोअणेसु खिवन्ता ।  
अच्चुअ लच्छि णिवासं  
णिच्च णिरुठं णिहिं व पेच्छन्ति तुमम् ॥

[००२.००४५] [०००७४]

विहडिअ णिबिडन्धारो

घडन्त जोई तिलोअ एक्क गह वई ।  
दिठ्ठिगओ जाण तुमं  
णमन्त सच्च ण हु ताण मोह तिआमा ॥

[००२.००४६] [०००७५]

विसअरसम्मि विरत्ता

विआरजणणेहि वि ण हु विकीरन्ता ।

जीवन्त मुक्क सरिसा

अच्चुअ दीसन्ति पावणा तुह भत्ता ॥

[००२.००४७] [०००७६]

गन्धव्व णअर सिमिणअ -

सारिच्छाणं सिरीण वण सरिआणम् ।

ण सुमरइ तुम्ह गहिओ

सरणागअ सच्च सइमओ जीवगओ ॥

[००२.००४८] [०००७७]

ण महेन्ति णाणवन्ता

तरङ्ग डिण्डीर बुब्बुअ सरिच्छाइम् ।

विहि पमुहाण पआइं

घणकन्दळि कन्द कअळि खम्म समाइम् ॥

[००२.००४९] [०००७८]

पुळइअ सपर सहावा

पुरिसा घेत्तूण सामिणो तुह सीळम् ।

णाह णअसच्च सघिणा

ण मुअन्ति कहां वि सव्व जण सोहदम् ॥

[००२.००५०] [०००७९]

माण मएसा मच्छर -

डम्भासूआ भआमरिस लोह मुहा ।  
दीसन्ति ण मोहसुआ  
दोसा दासाण सच्च तुह भत्ताणम् ॥

[००२.००५१] [०००८०]

जाण मई इअरमुही  
काळो सअळो वि ताण कलि वित्थारो ।  
जे तुह पअम्मि पवणा  
णत्थि कली णाअवइणअरवए ताणम् ॥

[००२.००५२] [०००८१]

अच्चासण्ण विणासा  
अच्चुअ पेच्छन्ति तावए भत्तजणे ।  
मोक्खरुईण सुमग्गे  
मूढा दिअहअरमण्डलम्मि व छिद्दम् ॥

[००२.००५३] [०००८२]

णितुडिअ दुम्माण घणा  
णिम्मल गुण घडिअ तारआ पब्भारा ।  
भासन्त भत्ति जोण्हा  
णअसच्च फुरन्ति णहणिहा तुह भत्ता ॥

[००२.००५४] [०००८३]

ण हु जम विसअम्मि गर्ई  
णअसच्च पअम्बुअं तुह पवण्णाणम् ।  
खलिआण वि जह जोग्गं  
सिक्खा सुद्धन्तकिङ्कराण व लहुई ॥

[००२.००५५] [०००८४]

कम्म गइदोस दुहिआ  
कअन्त भिउडी भुअङ्गि दंसण तत्था ।  
अच्चन्ति तुज्ज चलणे  
अच्चुअ पब्भठ्ठ वम्मह रसासाआ ॥

[००२.००५६] [०००८५]

आलग्गइ तुह चलणे  
अच्चुअ विहिणा वि अच्चणा आअरिआ  
जा एक्कन्ति पउत्ता  
सेसं व सअं सिरेण पडिगेण्हसि तम् ॥

[००२.००५७] [०००८६]

तुह मुह जोण्हा दाविअ -  
माणस ससिअन्त पवह संणिह बाहे ।  
अच्चुअ ण मुअसि भत्ते  
कळम्ब गोळ णिह कण्टअन्त णिअङ्गे ॥

[००२.००५८] [०००८७]



सव्वेसु वि णिव्वेरा

सरणागअसच्च गहिअसासअधम्मा ।

गअसङ्गा तुह भत्ता

जन्ति तुमं एव्व दुळ्ळहं इअरेहिम् ॥

[००२.००५९] [०००८८]

अहिवइणअरिन्द तुमं

आसणं वि गअणं व सइ दुग्गेज्झम्

विसएसु विलग्गन्ता

तूरन्ता वि ण लहन्ति डोळन्तमणा ॥

[००२.००६०] [०००८९]

भत्ता तावअ सेवा -

रसभरिआ सअलरक्खणोसुअ रुइणा ।

करणाइ धरन्ति चिरं

कङ्खिअमोख्खा वि अच्चुअ तुए ठविआ ॥

[००२.००६१] [०००९०]

ठिरगुण गिरिजणिएहिं

सन्तारेसि णअसच्च णिअभत्तेहिम् ।

जम्मपरिवाडिजलहिं

जङ्गमठिरसेउदंसणिज्जेहिजणे ॥

[००२.००६२] [०००९१]

पसमिअ भवन्तर भआ

पत्तं पत्तं हिअं ति परिपेच्चन्ता ।

भावेन्ति तुज्झ भत्ता

पिआइहिं व णअसच्च पच्चिमदिअहम् ॥

[००२.००६३] [०००९२]

पअडतिमिरम्मि भुवणे

पत्त पडिठ्ठाविअ परम णाण पईवा ।

णिज्जन्ति अच्चुअ तुए

णिअं पअं सइ सअं पहं कअकज्जा ॥

[००२.००६४] [०००९३]

दिठ तिच्च भत्ति णअणा

परिपेच्छन्ता अहिन्दउरणाह तुमम् ।

पत्ता तुह साउज्जं

पन्ति पूरेन्ति पण्णइन्दमुहाणम् ॥

[००२.००६५] [०००९४]

सण्णअ सुळहं अच्चुअ

समाहि सोवाण कम विळम्ब विमुहिआ ।

सरणं गन्तूण तुमं

मुत्ता मुउउन्द खत्तबन्धुप्पमुहा ॥

[००२.००६६] [०००९५]

देवाण पसुसमाणो

जन्तू गन्तूण देवणाह तुह पअम् ।

तेहिं चिअ सव्वेहिं

संसरमाणेहि होइ सइ दिण्णबळी ॥

[००२.००६७] [०००९६]

मोहन्धार महण्णव -

मुच्छिअ माआ महा रअणि पच्चूहो ।

अच्चुअ तुज्ज कडक्खो

विमुत्ति पत्थाण पुडम परिअर बन्धो ॥

[००२.००६८] [०००९७]

मोक्ख सुह रुक्ख मूळं

मोह जराउर महारसाअण पवरम् ।

सअल कुसलेक्क खेत्तं

किङ्करसच्च तुह कित्तणं अमिअणिहम् ॥

[००२.००६९] [०००९८]

णत्थि अहिक्कमणासो

विच्छेअम्मि वि ण पच्चवाअपसङ्गो ।

सप्पा वि तुह सपज्जा

रक्खइ अच्चुअ महत्तरादु भआदो ॥

[००२.००७०] [०००९९]

अपसाए अपसण्णा

तुज्झ पसाअम्मि दाससच्च पसण्णा ।  
आरज्झा होन्ति परे  
किं तेहि पसङ्गलम्भिअ पहावेहिम् ॥

[००२.००७१] [००१००]

इअरतिअसा पसण्णा

किङ्करसच्च मह किं णु काहिन्ति हिअम् ।  
णीहार घण सएहिं  
ण हु पूरिज्जइ कहं वि चाअअतिण्हा ॥

[००२.००७२] [००१०१]

अणुगअ सुह मिअ तिण्हा

अच्चुअ वीसमइ तुज्झ मामअतिण्हा ।  
पवहेसु पसरिअए  
आसिअ पवहन्त घण किवा सरिआए ॥

[००२.००७३] [००१०२]

विअल सअलङ्ग विसमे

धम्मे णअसच्च धअणिहे धारेन्तो ।  
कन्तारपन्थओ विअ  
खळन्त चळणोम्हि काअर विसीरन्तो ॥

[००२.००७४] [००१०३]

ठिर धम्म वम्म थइअं

अधम्म पवणाण अग्ग खन्ध पउत्तम् ।

अघडन्त विपडिसारं

अच्चुअ मं हससि णूण लच्छि समक्खम् ॥

[००२.००७५] [००१०४]

तरिउं अच्चुअ दुरिअं

इमम्मि देहम्मि एक्क दिअहे वि कअम् ।

काळो अळं ण सअळो

कळुणाए तुज्झ पुण्णपत्तं म्हि इमो ॥

[००२.००७६] [००१०५]

अच्चुअ तुज्झ गुणाणं मह

दोसाणं वि णत्थि कुत्थ वि गणणा ।

तह वि जओ पुढमाणं

अहिअं लीणाण होइ ण हु दोब्बळ्ळम् ॥

[००२.००७७] [००१०६]

रत्तिं दिअहं अच्चुअ

तुडिअ पडन्ताइ आउ दुम खण्डाइम् ।

दठूण वि दरिअमणं

बालं एण्हि वि भरसु मं अपमत्तो ॥

[००२.००७८] [००१०७]

णीसास सङ्कणिज्जे

देहे पडळन्त सळिल बिन्दु सरिच्छे ।

मुणसि णअसच्च तुं मं

जरन्त करणे वि दीह जोव्वण तिण्हम् ॥

[००२.००७९] [००१०८]

अमुणिअ णिअ काअव्वं

तिळग्ग मुणिएसु मं वि पडिऊळ गइम् ।

इअ णिअ सहाव विळिअं

हाउं दासाण सच्च णहु तुह जुत्तम् ॥

[००२.००८०] [००१०९]

कोहं किं करणिज्जं

परिहरणिज्जं वि किंति जाणसि सव्वम् ।

तीरसि अ तं हिअं मह

तिअसेसर कुणसु णिअ हिअअ णिक्खित्तम् ॥

[००२.००८१] [००११०]

एण्हि उवरिं वि इमो

गुण गहिओ दारुपुत्तओ व परवसो ।

तस्स वि मह तिअसेसर

तीसु वि करणेसु होसु सुहसङ्कप्पो ॥

[००२.००८२] [००१११]

णिअ कम्म णिअळ जुअळं

अच्चुअ काऊण मह पिअप्पिअ वग्गे ।  
काहे घोर कळेवर -  
काराघर कुहर णिग्गअं काहिसि मम् ॥

[००२.००८३] [००११२]

हद्दे तुमम्मि कइआ

विस्समिअं बम्ह धमणि मग्ग णिहिन्तम् ।  
दिणअर दिण्णग्ग करं  
अच्चुअ दच्छिहिसि दइअडिम्मं विअ मम् ॥

[००२.००८४] [००११३]

काहे अमाणवन्ता

अग्गि मुहा आइवाहिअ तुह पुरिसा ।  
अइळङ्गेहिन्ति मिमं  
अच्चुअ तम गहण तिउण मरुकन्तारम् ॥

[००२.००८५] [००११४]

लद्धिअ विरआ सरिअं

लम्भिअ सइ सुद्ध सत्तमअ सोम्मतणुम् ।  
कअ बम्हालङ्कारं  
काहिसि णअसच्च किङ्करं काहे मम् ॥

[००२.००८६] [००११५]

संसार साअराओ

उक्खित्तं तिअस णाह फुरिआळोअम् ।  
काहे काहिसि हिअए  
कोत्थुह मणि दप्पणं व लच्छि पुळइअम् ॥

[००२.००८७] [००११६]

काहे तुह पअ पउमे

होहिमि णअसच्च केळि कन्त तिहुवणे ।  
मअण रिउ मउड मण्डण  
सुरसरिआ ओत्त सूइअ महुप्पवहे ॥

[००२.००८८] [००११७]

उवणिसआसिर कुसुमं

उत्तंसेऊण तुह पअम्बुअ जुअळम् ।  
दइओ होहिमि कइआ  
दासो दासाण सच्च सूरिसरिच्छो ॥

[००२.००८९] [००११८]

अउणो णिउत्ति जोग्गं

ओआर विहार सहअरत्तण धणिअम् ।  
अप्प समभोअ मेत्तं  
अणुहोहिसि देवणाह काहे णु मिमम् ॥

[००२.००९०] [००११९]



इअ फुडमणोरहं मं  
एआरिसवअणमेत्तसारं वसअम् ।  
कुणसु णिअगुणगणेहिं  
सच्चं दासाण सच्च सइ सच्छन्दो ॥

[००२.००९१] [००१२०]

बाळपवगोव्व तरळो  
मारुइजाइत्ति साअरं तरिउमणो ।  
पत्थेमि तुमं अच्चुअ  
कङ्खिअपअपउम खमसु मह कावेअम् ॥

[००२.००९२] [००१२१]

अच्चुअ विसअक्कन्तं  
भवणवावत्तभमिणिवुडुज्जन्तम् ।  
जणणी थणंधअं विअ मं  
उद्धरिऊण सेवसु सअं पच्छम् ॥

[००२.००९३] [००१२२]

कम्ममअघम्मतविअं  
सुहमिअतिणहाहि काहि वि अतण्णाअम् ।  
कारेसु णिव्वुअं मं  
करआसिसिरेहि अच्चुअ कडक्खेहिम् ॥

[००२.००९४] [००१२३]

तुह चिन्तण विमुहाणं

दिट्टि विसाणं व दंसणाउ मोएन्तो ।

अमिअ मुहाणं विअ मं

अच्चुअ भत्ताण णेसु णअणासारम् ॥

[००२.००९५] [००१२४]

विस मिळिअ महु णिहेसु अ

तण पडिमेसु अ पडिग्गहेसु पळुठिअम् ।

अमिअ णिहिम्मि व अच्चुअ

ठावेसु तुमम्मि णिम्ममं मह हिअअम् ॥

[००२.००९६] [००१२५]

णिच्चं इमम्मि किवणे

णिकिखव णमन्त सच्च णिहिसारिच्छे ।

पवहन्त णह पहाझर -

पसमिअ पणमन्त संजरे तुह चलणे ॥

[००२.००९७] [००१२६]

सरणागओत्ति जणिए

जणवाए वि जइ अच्चुअ ण रक्खसि मम् ।

होज्ज खु साअरघोसो

साअरपुळिणम्मि तारिसं तुह वअणम् ॥

[००२.००९८] [००१२७]

णिकित्तोमिह अ अगई

णिवुणोहि तुमम्मि णाह कारुणिएहिम् ।

ते तुह दठूण पिए

णिहुअं णअसच्च भरसु अप्पाण भरम् ॥

[००२.००९९] [००१२८]

णअसच्च पक्कणाणिअ -

गळिअ किलाअ भमणिअ कुमारं व णिवो ।

होज्जन्त जोव्वण वहुं

वरोव्व मं लहसु मन्तिअण विण्णविअम् ॥

[००२.०१००] [००१२९]

इअ कइ तक्किअ केसरि -

वेअन्ताअरिअ वेङ्कडेस विरइअम् ।

सुहअं अच्चुअसअअं

सहिअअ हिअएसु सोहउ समग्गुणम् ॥

[००२.०१०१] [००१३०]

कवितार्किकसिंहाय कल्याणगुणशालिने ।

श्रीमते वेङ्कटेशाय वेदान्तगुरवे नमः ॥

🙏 श्रीमते श्रीनिगमान्त महादेशिकाय नमः 🙏